



RESOLUCIÓN DO 16 DE OUTUBRO DE 2018 POLA QUE SE FORMULA O INFORME AMBIENTAL ESTRATÉXICO DA MODIFICACIÓN PUNTUAL NÚMERO 4 DO PLAN XERAL DE ORDENACIÓN MUNICIPAL DE COIRÓS

Promotor: Concello de Coirós

Órgano substantivo: Dirección Xeral de Ordenación do Territorio e Urbanismo (DXOTU)

Expediente: 2018AAE2240

Código web: 2119/2018

O Servizo de Avaliación Ambiental de Plans e Programas, da Subdirección Xeral de Avaliación Ambiental, formulou a proposta que a continuación se transcribe:

ANTECEDENTES

1. O concello de Coirós dispón dun Plan xeral de ordenación municipal (PXOM) que foi aprobado definitivamente o 19.09.2002, o cal foi obxecto de tres modificacións puntuais.
2. O día 10.07.2018 a Dirección Xeral de Calidade Ambiental e Cambio Climático recibiu un escrito do Concello de Coirós no que solicita iniciar o procedemento de avaliación ambiental estratéxica simplificada da Modificación puntual número 4 do PXOM de Coirós, para o que achega o documento ambiental estratéxico e o borrador da proposta.
3. O día 16.07.2018 esta Dirección Xeral iniciou un período de consultas previas á formulación do informe ambiental estratéxico por un prazo de dous meses, facendo públicos os documentos na súa sede electrónica. Ao mesmo tempo consultouse á Dirección Xeral de Ordenación do Territorio e Urbanismo, entre outras administracións públicas.

CONSIDERACIÓNS LEGAIS

1. A Lei 2/2016, do 10 de febreiro, do solo de Galicia (LSG), integra no procedemento de aprobación dos instrumentos de planeamento urbanístico o proceso de avaliación ambiental estratéxica previsto na Lei 21/2013, do 9 de decembro, de avaliación ambiental. A través do Decreto 143/2016, do 22 de setembro, aprobouse o regulamento da dita Lei do solo.
2. Segundo o artigo 46.2.a) da LSG as modificacións menores dos plans xerais de ordenación municipal deben someterse ao procedemento de avaliación ambiental estratéxica simplificada.
3. De acordo co artigo 31.2 da Lei 21/2013, o órgano ambiental -tras consultar ás administracións públicas afectadas e ás persoas interesadas por un prazo de dous meses- emitirá o informe ambiental estratéxico.
4. A Dirección Xeral de Calidade Ambiental e Cambio Climático ten atribuídas as funcións en materia de avaliación dos efectos de determinados plans e programas no ambiente (Decreto 167/2015, do 13 de novembro, polo que se establece a estrutura orgánica da Consellería de Medio Ambiente e Ordenación do Territorio; Decreto 177/2016, do 15 de decembro; Decreto 88/2018, do 26 de setembro, polo que se establece a estrutura orgánica da Xunta de Galicia).

CONSIDERACIÓNS TÉCNICAS

1. Características da Modificación puntual

Ámbito de actuación: tramos das estradas de titularidade provincial DP-2701, DP-2702, DP-2703, DP-0301 e DP-0302 ao seu paso polos núcleos rurais de Coirós de Arriba, Coirós de Abaixo, Espenuca,

Obxecto: alterar as aliñacións dispostas actualmente para os treitos das estradas provinciais que discorren por solo de núcleo rural, establecendo unhas distancias maiores entre aliñacións para o seu recoñecemento como treitos urbanos.

- Establecer unha distancia xeral entre aliñacións de 16 metros, que se corresponderá sempre que sexa posible a 8 metros do eixo. A sección transversal altermase en zonas puntuais pola existencia de edificacións consolidadas nas marxes da estrada, que se corresponden con zonas tradicionais dos núcleos rurais.
- Eliminación de parte dun viario previsto polo PXOM no núcleo rural de Castrillón, que comunica a DP-0301 cunha estrada municipal. Este viario abriuse parcialmente no seu tramo inicial para dotar de acceso a un centro da terceira idade, sen darlle continuidade ata a pista municipal existente.
- Adaptación de viario no núcleo de Coirós de Arriba: o PXOM prevé unha vía cun trazado lixeiramente oblicuo, e na realidade abriuse en perpendicular.



Trazado propuesto na M.P.

- Recoñecemento dun camiño existente no núcleo de Parada: trátase de establecer as aliñacións nun camiño existente que discorre entre muros, xa que no PXOM non foron delimitadas por erro.



Proposta da M.P.



2. Características ambientais da área probablemente afectada

As infraestruturas de comunicación afectadas pola Modificación son a DP-2701, DP-2702, DP-2703, a DP-0301 e DP-0302, que discorren polo municipio de Coirós, pertencente á comarca de Betanzos. Ditas estradas enlazan con outras vías de maior intensidade de vehículos, como a N-VI ou a autovía A-6, que conta con mapa estratéxico de ruído de estradas do Estado en Galicia.

A proposta non afecta a ámbitos protexidos pola Rede galega de espazos protexidos ou pola Rede Natura 2000, hábitats de interese comunitario ou terreos que contén con algún réxime de protección por aplicación da lexislación de conservación da natureza, dos espazos naturais ou da flora e a fauna.

Respecto aos elementos do patrimonio cultural, o ámbito da Modificación coincide con varios contornos de protección de bens catalogados, así como coa traza tradicional e outras estruturas características dos núcleos rurais.

3. Período de consultas previas

Recibiuse resposta da Dirección Xeral de Ordenación do Territorio e Urbanismo, da Dirección Xeral do Patrimonio Cultural, do Instituto de Estudos do Territorio, da Dirección Xeral de Ordenación Forestal e da Dirección Xeral de Pesca, Acuicultura e Innovación Tecnolóxica.

O Concello deberá considerar a totalidade destas observacións no proceso de elaboración da Modificación, para o cal se lle remiten os textos íntegros recibidos. Non obstante, resúmense a continuación as principais cuestións formuladas:

Dirección Xeral de Ordenación do Territorio e Urbanismo

Considera xustificadas as razóns de interese público da Modificación. No entanto, indica que cómpre incorporar o plano O-1.5 do PXOM vixente axustado ás novas determinacións, recollendo a corrección no trazado da DP-0302. Para a tramitación da Modificación, estarase ao disposto do establecido no artigo 83.5 da LSG e no artigo 144 do Regulamento que a desenvolve.

Dirección Xeral do Patrimonio Cultural

Ademais dos bens do patrimonio cultural identificados no documento, constátase a existencia de elementos tradicionais ao longo de varios dos rúeiros do ámbito e, en moitos casos, configurando as súas aliñacións. Dado o valor que se presume nas estruturas tradicionais dos núcleos rurais, habería que analizar en profundidade os tramos nos que se está a actuar, ao obxecto de coñecer con exactitude a realidade existente e salvagardar aquilo que se define como tradicional e conforma os seus valores.

Achega unha serie de medidas protectoras e correctoras a adoptar pola Modificación, como a realización dunha prospección, corrixir a cartografía, elaborar un catálogo propio da Modificación ou incluír na normativa un apartado específico relativo ao patrimonio cultural. Respecto da proposta, recomenda revisar a necesidade do modelo proposto, evitando a imposición xenérica dun modelo que homoxeneíce a estrutura rural, e achega unha serie de consideracións particulares en cada un dos núcleos. Nestas últimas, destaca o establecemento de medidas cautelares no contorno de protección dos bens arqueolóxicos do núcleo rural 12 Castrillón-Parada, a posible afección ao lavadoiro no núcleo rural 14-Xora, ou a conveniencia do mantemento da edificación tradicional no núcleo rural 15-Boqueixón.

Instituto de Estudos do Territorio

Informa de que, segundo o Catálogo das Paisaxes de Galicia, o concello de Coirós se localiza na grande área paisaxística do Golfo Ártabro, na comarca paisaxística Golfo Ártabro Interior. Ademais, parte do termo municipal insírese na Área de especial interese paisaxístico Fragas do Mandeo, aínda que ningún dos núcleos rurais afectados pola Modificación atópanse nela.

En canto á afección da proposta, sinala que a Modificación non presentará unha forte incidencia sobre a paisaxe, toda vez que a alternativa escollida non vai afectar ás edificacións que poidan presentar interese desde o punto de vista estético ou patrimonial, e que os cambios no trazado de viarios no PXOM son puramente instrumentais.

Dirección Xeral de Ordenación Forestal

Indica que o ámbito da Modificación non afectan ao ámbito forestal, polo que ten nada que obxectar á proposta.

Dirección Xeral de Pesca, Acuicultura e Innovación Tecnolóxica

Informa de que non é previsible que as actuacións comprendidas na Modificación teñan impacto nas actividades de acuicultura mariña ou continental da súa competencia.

4. Efectos ambientais previsibles. Análise segundo os criterios do anexo V da Lei 21/2013

Con esta Modificación puntual do PXOM de Coirós preténdese modificar as aliñacións nunha serie de estradas que discorren por núcleos rurais do municipio, afectando a un ámbito reducido do territorio e con escaso alcance. A Modificación non establece un marco para a futura autorización de proxectos, máis alá dos necesarios implantar os usos autorizados, nin tampouco inflúe noutros plans ou programas.

O ámbito da Modificación non afecta a espazos protexidos pola lexislación sectorial do patrimonio natural e a paisaxe, nin ás servidumes de augas.

Ao respecto do patrimonio cultural, a revisión das aliñacións pode afectar aos contornos de protección de varios bens catalogados, así como á traza tradicional característica dos núcleos rurais. Porén, non se prevén efectos significativos, sempre que se atenda ás consideracións establecidas pola Dirección Xeral do Patrimonio Cultural.

PROPOSTA

Tendo en conta o indicado nos apartados anteriores e a análise realizada segundo os criterios do anexo V da Lei 21/2013, do 9 de decembro, de avaliación ambiental, propoño non someter ao procedemento de avaliación ambiental estratéxica ordinaria a *Modificación puntual núm.4 do PXOM de Coirós*, ao considerar que non se producirán efectos significativos no ambiente.

Santiago de Compostela, 16 de outubro de 2018

A xefa do Servizo de Avaliación Ambiental
de Plans e Programas

Margarita Segade Castro

Conforme:

O subdirector xeral de Avaliación Ambiental

José Manuel Tobío Boquete





RESOLUCIÓN

De conformidade coa proposta anterior, resolvo **non someter ao procedemento de avaliación ambiental estratéxica ordinaria a *Modificación puntual* núm. 4 do PXOM de Coirós.**

Este informe ambiental estratéxico farase público no *Diario Oficial de Galicia* e na páxina web da Consellería de Medio Ambiente, Territorio e Vivenda (www.cmaot.xunta.gal); remitirase ao Concello de Coirós, xunto á copia dos informes recibidos na fase de consultas previas, para a súa consideración na tramitación da Modificación puntual.

A resolución perderá a súa vixencia e cesará na produción dos efectos que lle son propios se, unha vez publicada no *Diario Oficial de Galicia*, non se aprobase a *Modificación puntual* núm.4 do PXOM de Coirós no prazo máximo de catro anos dende a súa publicación.

Contra esta resolución non procederá recurso algún, sen prexuízo dos que procedan en vía administrativa ou xudicial fronte ao acto, no seu caso, de aprobación da Modificación puntual.

Santiago de Compostela, 16 de outubro de 2018

A directora xeral de Calidade Ambiental e Cambio Climático



María Cruz Ferreira Costa